



Russia-i Ukraine yimtiba
amakdang nisung 17 tepset

Spurs-i Fernandes
£85m agi alizükogo



Pongshi Phom-i Airways aser Railways indang Advisor inyaktsü

Dimapur, Chiteni/July 02 (TYO): Brehostibarnü Nagaland sorkari Advisor to the Chief Minister for Airways and Railways inyaktsü atema MLA , A Pongshi Phom shimogo aser state nung sectors ana dak sendakba ketdangsütsü mapa pa nem nungloksü.

Pa shimba osang ya Chief Secretary Sentianger Imchen,

IAS-i Cabinet Secretariat (Cabinet Cell) ajanga metetdaksü aser tang nungi tenzüksü.

Iba mapa nung shimokba atema senotsü teyari talila mali. Pa nem Nagaland sorkari Nagaland Legislative Assembly züngsem ka ama agütsüba dak alaka taa, itasen, emoluments, remuneration mesüra tanga teyari magütsütsü, ta sangdong ajanga ashi.

NSF ketdangsür anema FIR benoka lir



Social media nung prokshiba video nungi agizüba noksa.

Dimapur, Chiteni/July 02 (TYO): Dimapur mimh Prysm Lounge kibur Tito Yephthomi, shiba District Auto Drivers' Union aser Dimapur Restaurant Union nung tir lir, pai East Police Station, Dimapur nung Naga Students' Federation (NSF) indang finance secretary anema First Information Report (FIR) benoka June 30 nü lounge telung nung osettsüset raksatsüba nung shilem agia lir ta tai tongloksür.

Iba tatalokba indang ashishitepba ya July 1 nü aru aser July 2 nü FIR benok, ta Deputy Commissioner of Police (Crime) & PRO, Dimapur Police, Khekali Y Sumi-i metetdaksü.

Iba ken o tang bushisingdangba mapang lir aser tang tashi nisung kata pua mali, ta la ashi.

Osettsüset raksatsü ta tai tonglokja aliba ya kechi tebilemba nung inyakar mejangja, kechiaser tang ang iba tatalokba bushisingdangba mapang lir.

Kasa mapang CCTV footage ka social media nung tang prokshia aliba nung June 30 nü NSF Finance Secretary Katho P Awomi-i baseball bat ka amshia Prysm Lounge nung tzü ajemba marok züksaba nguogo.

Ano Dimapur Restaurant Union-i June 28 nü senden ka nung NSF nem senotsü teyari agütsütsü lemtetba indang tezüluba ka social media nung kanga prokshia amshir.

Iba document nungya parnoki NSF nem senotsü teyari agütsütsü indang jembia aser Dimapur Restaurant Union nung züngsem shia dang temulunger tenla sen 5,000 agütsütsü ayongzütsü pangjemba shia lir. Iba document nungya restaurants 31 tenüng zülua lir.

Ajisüaka July 1 nü Prysm Lounge kibur Tito Yephthomi-i jangjashija sangdong ka agütsüba nung social media nung prokshia aliba CCTV footage aser pangzüng ya meshidak angatetba lir ta ashi.

NSF-i Dimapur Restaurant Union mesüra iba tentet züngsem dang senotsü teyari memeshi, ta pai ashi.

Dimapur Restaurant Union aser club kiburtem senden ka June 28 nü amen aser iba mapang züngsem temi mulungsoa NSF nem senotsü teyari agütsütsü pangjem, ta Yephthomi-i ashi.

Senotsü teyari agütsütsü onük ya senden nung alirtemi benokba aser NSF-i meshiba mesüra benokba onük masü, ta ashi.

Nagaland nung VB-G RAM G Mission tenzükogo

Kohima, Aami/June 02 (TYO): Linük tesem ajunga den külemi Brehostibarnü Department of Rural Development, Nagaland ajanga Kohima nung state-level sentong ka agia Viksit Bharat-Guarantee for Rozgar and Ajeevika Mission (Gramin) (VB-G RAM G) tenzükogo.

Commissioner & Secretary, Rural Development, Thavaseelan K., IAS-i iba sentong rateta jembidang, yimdaklir senotsü aruba lenmang tashi itshiba nung ibai tongtipang alizüing ka lir aser Viksit Bharat aser Viksit Nagaland mangdang tejakleni bener aor, ta ashi.

Iba scheme ya July 1 nungi mapa kuma amshir, aser taoba mapang amshia aruba Indian National Rural Employment Guarantee Framework (INREGF) melen lir, aser rural development asoshi asendenshiba sayur, ta pai ashi.

Aluyimba, horticulture, handicraft, handloom, süngkum aser tanga rural enterprises nung state teimla tulu lir, ta pai ashi. Akhi-alemi mapang nungi amshia aruba shisatsü aser tanü asüng technology tasen, innovation aser market linkages tashi taitba den meyoktepa senotsü aruba lenmang tajungba agütsütsü iba mission nükjidong lir ta ashi.

VB-G RAM G yagi digital governance atema ashir, kong nüburtem rongsen GIS mapping



Thavaseelan K., IAS

aser geo-tagging asüba, e-KYC, aser mapang shidak nung data bendentsü atema National Mobile Monitoring System(NMMS) aser terenlok mapa ochishia ketdangsüba ama technology amshir, ta Commissioner & Secretary-i ashi.

Tongtipang mapatem jangjatetba, terenlok sentong yangluba aser itemji inyakba ajanga ajangzüka mita reprangba nung Village Development Boards, Village Councils, Self-Help Groups aser nüburtemi tongti shilem agitettsü, ta ashi.

Iba scheme yagi tongtipangsa mapa telemsa pezü nung rangloker - tzü mesüba ajanga water security, groundwater recharge, tzü kumzüka ayuba aser watershed development; lenmang aser tesendaktep densema yimtsüng nung tongtipang ki o jen tem; storage facilities, markets aser productive community

assets ama sen lenmang arutsü asoshi ki o jen; aser tzüingsang mopung majungba agi kongshiba ajemdaksütsü nükjidong nung climate resilience tem lir.

Iba mission nung Self-Help Groups aser rural development stakeholders temi temulung agüja shilem agitsüla, ta pai ashi aser district ketdangsür, Block Development Officers, Village Development Boards, Village Councils aser community institutions tem dang bendanga agütsür aser lungjemer iba scheme mapa kuma inyaktsü ayongzüka liasü.

Iba scheme yagi Nagaland nung rural development tashi kanga itshia mapang talanglang amshitetsüsa community assets adokdaksütsü, sustainable livelihood opportunities agitsütsü aser yimdak yimtsüng nung takum jenjang tajungba kumdaksütsü, ta Thavaseelan-i ashi.

Iba sentong nung Jenny Kath, Deputy Director, RD menden liasü aser John Wesley Magh, Deputy Director RD ajanga VB-G RAM G Scheme aser Viksit Gram Panchayat Plan (VGPP) indang presentations agütsü aser linük ajunga nung iba scheme sayaba live broadcast süa liasü.

Sentong tembanga Director, Rural Development, M. Mongna Konyak-i melepzüng o jembia liasü.

Manipur azüdokshi ajanga Centre mulungsentsü sayur: Rahul Gandhi

New Delhi, Chiteni/July 02 (Agencies): Manipur nung azüdokshi lendong tasen atalokba atema Congress lenir aser Lok Sabha nung Leader of Opposition, Rahul Gandhi-i Brehostibarnü Centre tenüng asen aser tribal yimtsüngtem nung ki rongdoktsüba yagi Narendra Modi sorkar dak nübur tsüngta telemsa adokdaksütsü shisatsü aliba sayur, ta ashi.

Kamjong district nung tang tesüsa lendong timtem atalokba dak sendakba nung, President's Rule benokaka state nung mepetmesü mazüokteter, ta Gandhi-i ashi.

"Küm aika Manipur rongra arur, aser ano nisung aliba ki aika

tsükchitep aser azüdokshi mi agi mitsü kumdaksüogo. Sorkar ana aser President's Rule liaka, mepetmesü tamajungba ang akumer. Nisung meyerijang aika takum samaogo, kobong zünger mezüngmai raksatsüogo," ta Gandhi-i social media post nung ashi.

Manipur nung azüdokshi ya Centre indang tasa ajanga lir ta tai tonglokja, nüburtem tsüngta telemsa adokdaksütsüsa Modi sorkar tangatetba aliba ajanga tamangba yimsü, caste, oshi, region aser maitsü nung ajemdaker lokti telemsa tali tamajungba kumdaksüogo, ta Gandhi-i ashi.

Manipur nung aliba nüburtemi

Ato Kilonser dak nungi temeim angutsü teimla samaogo ta pai ashi.

"Manipur nung iba dang tajungba langa lir - aser iba atema lenmang ajak agi India lungjemtsüba ya dang lir," ta Gandhi-i ashi.

India-Myanmar arütsü anasa lendong tasen ataloka Kamjong district nung nisung aliba ki aika rongdoktsür anogo ka lir pai iba o ya ashi.

Osangtem ajanga ashiba agi, Kuki nunger Phaimol yimtsüng aser Tangkhul Naga nunger Kongkan Thana aser Shangkalok yimtsüngtem nung iba timtem ya atalok. Ki aika mitsü kuma rongdok ta ashir.

Assam assembly budget session July 6 nü tenzüksü

Guwahati, Chiteni/July 02 (Agencies): Himanta Biswa Sarma-i aniba sorkar kümsük tanabuba indang budget Assam Legislative Assembly nung July 10 nü benoktsü, ta Assembly Secretariat ajanga sangdong ka nung ashi.

Finance Minister Jayanta Malla Baruah-i financial year 2026-27 atema Budget Estimates aliba Annual

Financial Statement ya benoktsü.

Assam Legislative Assembly indang budget session ya July 6 nü tenzüksü aser July 31 tashi alitsü aser iba mapang sittings 16 alitsü sentong lir.

Tawa tembangba Assembly elections nung National Democratic Alliance (NDA) ajanga yimsüsütsü tashi soita yutetba sülen iba budget senden

ya amentsü.

Züngsem 126 aliba House nung NDA-i menden 102 ngutet, kong Bharatiya Janata Party (BJP) ajanga menden 82 nguteta state nung mezüngbuba single-party majority akum. Par den sendaktepa aliba Asom Gana Parishad (AGP)-i menden ter aser Bodoland People's Front (BPF)-i menden ter nung takok angu.

BJP Nagaland-i ayongzüka State Organisational Workshop agi



Dimapur, Chiteni/July 2 (TYO): Bharatiya Janata Party, Nagaland-i ayongzüka State Organisational Workshop ka July 2 nü Town Hall, Dimapur nung agiogo. Sentong nung state kübok tesem balala nungi party lenirtem aser party kübok inyakerteri shilem agiogo. Party inyakyim akangshitsü aser jenjang ajak nung sendaktepa inyaksü nükjidong nung iba sentong ayongzüka agi.

Workshop nung Ex-MP, Chairman of Ethnic Committee Lok Sabha, aser National Secretary BJP, Shri. Vinod Sonkar tongti o jembir liasü. Sentong nung o jembiba mapang pai Nagaland terenlok asoshi lokti tentet takang, bendanga agütsüba lenir aser nüburtemi shilem agitsü koda tongtibang iba indang lemsatöp.

Paisa, Ato Kilonser lenisüba nung terenlok maparen balala

inyakba indang metetdaksü aser party kübok inyakerteri dang grassroot jenjang nung party inyakyim akangshitsü ajungshi, ajita asünungdang lokti nung ajak ajangzüksü, ta ashi.

Sentong nung okila jembiba mapang state tir Benjamin Yephthomi-i, sentong nung shilem agirtem pelashishia agizük aser party kübok inyakerteri dang longjemshitsü bendanga agütsüshitsü aser party inyakyim akangshitsü aser nüburtem nendaka aser bendanga agüja tenzüksü ayongzüka liasü.

Iba sentong ya National Executive Member, BJYM Arvind Damani lenisüba nung agi, aser Nagamese AG Church Pastor Rev. Kevihulie Pienyu-i Tsüngrem temoatsü meshizüka sarasadema liasü. Sentong nungsa State Vice President Khevishe Achumi-i lokti pela

agizükba o jembiba, Vivi Yephthomi aser lar teloki Sumi Xülhe saya aser Rajen Debnath-i Vande Mataram tena liasü.

Workshop mapang organisational terenlok, party tetangshiba inyaksangshitsü aser grassroots akangshitsüba dak rangloker training session asem agia liasü.

Workshop nung Government of Nagaland MLA aser Advisor, Konngam Konyak, NSMDC Chairman Kuputo Shohe, Bio-Resources Chairman Wanphong Konyak, District tir aser General Secretary ajak, 60 Mandals/ Assembly Constituencies tir aser general secretary ajak, State Morcha tir aser general secretary tem, State ketdangpurtem, Media adser IT Cells züngsemtem, taoba mapang Minister aser MLA tem, taoba election candidate tem aser councillor temi shilem agiogo.

Chumu nung Solid Waste Management workshop agi

Dimapur, Chiteni/July 2 (TYO): Solid Waste Management dak sendakba nung anogo ka atema Workshop ka June 30 nü DC Conference Room, Chumoukedima nung agiogo.

Iba sentong nükjidongji Chumoukedima jila nung urban stakeholders ajak nem tangazükba agütsütsü aserparnok renema toktsütsü asoshi liasü. Stakeholder tem ya district nung jana kanga junga anepalua entoktsü atema inyakyim takok ngua aotsü asoshi tangar nükrangdong aser milen bener ama inyaksangshidaksütsü atema iba sentong ayongzüka agiogo.

Sentong ya Additional Deputy Commissioner, Chumoukedima. T. Lemlila Sangtam, NCS lenisüba nung agia liasü.

Workshop nung Nagaland Pollution Control Board (NPCB), Public Health Engineering Department (PHED), aser Department of Urban Development nungi shisalen sayurtem, Chumoukedima Town Council (CTC) Councillor tem, Chumoukedima Chamber of Commerce züngsemtem aser tanga stakeholder temi shilem agia liasü.

"Freedom from Garbage,"

omen nung ajemdaker iba workshop agiogo. Shisalen sayurtemi Solid Waste Management Rules, 2026 indang metetdakja liasü. Parnoki talisa janatem kanga junga bendena bendanger entoktsüba dak rangloker tangazükba agüja liasü.

Iba workshop ya Chumoukedima jila nung stakeholder tem nem tangazükba agütsütsü aser parnok ya jana kanga junga bendena entokba yimya tajung amshia sustainable terenlok ajungkettsü asoshi tongpu apur kaka kümdaksütsü nükjidong nung ayongzüka agiogo.



Longleng nung Disctrict Education Officer (DEO) Wt Y. Anungla goverment mapa nung kümsük abensar June 30, 2026 nü mapa nungi anenba tepila sentong agiba sülen külem inyaker aser kinüngertem den agiba noksa ka yangi angur . La ya Tsüngrem tsübuba aser mapa nung kanga tenendak aser meranga inyakba tenzüker ka liasü.

NBSE-i CMMSF naroküm atema metetdaksü

Dimapur, Chiteni/July 2 (TYO): Nagaland Board of School Education-i, HSLC Examination 2026 batch nung takok tajung angurtem shirnok Chief Minister's Meritorious Students Fellowship (CMMSF) angutsü temsüa ali parnok dang Felicitation aser naroküm agütsüba sentong ya July 9 nü Nagaland Civil Secretariat anasa Capital Convention Centre, Kohima nung 11:00 ako nungi tenzüka agitsü ta

metetdaksüogo.

Sentong nung Advisor for School Education, Dr. Kekhrielhoulie Yhomewill alakteta jaoker asütsü.

Kaketshirtem dang parnok taoba mapang azüngba school indang uniform semer arutsü mepeshia metetdaksüogo. Parnok den tsürapur ka anir arutettsü, aser sentong agitsüba tesem nung 10:30 ako tashi nungbo menseper alitsü metetdaksüogo.

Wokha DC-i kiset shiruru asüba indang metetdaksütsü tetuyuba kar agütsü

Dimapur, Chiteni/July 2 (TYO): Wokha Deputy Commissioner-i sangdong ka ajanga, State Disaster Response Fund (SDRF) kübok teyari agitsü atema kiset shiruru asüba indang osang metetdaksütsü asoshi tetuyuba kar agütsüogo.

Home Department, Nagaland State Disaster Management Authority nungi tetuyuba agütsüba sülen tang iba osang ya sangdongogo.

Tetuyuba nung ashiba agi:

1. Lendong balala ajanga kiset shiruru asüba kiburtemi ghonda 24 tsüngda anasatiba Veterinary Centre mesüra administrative authority nem metetdaksütsüla
2. Osang angazükba sülen District Veterinary Officer mesüra field staff temi anogo asem tsüngda tsüngtong tonga oa tatalokba asadangsü.
3. Kiburi agiba shiruru tasümag noksa Geo tagged sür aliba ya

ken o dak sendakba aliba ketdangsürtem nem agütsütsüla.

4. Takoktsü dang süra qualified veterinarian kati post mortem examination agitsüla.

5. Lendong atalokba tesem oa asadanga den shiruru asüba kuli tejangja metetba sülen District Veterinary Officer-i death certificate ka agütsütsüla.

6. Chief Veterinary Officer temi record kanga junga ayutsüla, item ya District Disaster Management Authority (DDMA) nem agütsütsü aser Directorate nema copy ka agütsütsüla.

Kasa sangdong ajangsa mapang shitak nung teyari agitettsü aser district nung kiset shiruru asüba kanga junga mangaoka ayutsü asoshi inyakyim sülen kanga junga anidaksü nüngdakba metetdaksüogo.

Longleng nung WMC senden menogo

Dimapur, Chiteni/July 2 (TYO): Ward Waste Management Committee (WMC) Consultative senden ya Addl. Deputy Commissioner & Administrator, Longleng Town Thungchanbemo Tungoe, NCS lenisüba nung menogo.

Senden nung sanitation dak sendakba nung onük balala aser Longleng jila nung Commercial/ Residential tesemtem jaka nung sanitation services takaratiba nung benoka inyaksü atema sensaksema liasü.

Senden nung mendenbubai züngsem ajak pelashishia agizük aser public utility service balala aser ki shiai tua jana bendenba inyakyim tenzüka indang metetdaksüba den, senden nung dena alirtem dang SolidWaste Management Rules, 2026 ajang ajanga benoka inyaksü koda tongtibang iba indang metetdakja liasü.

Onük balala benoka sensak asema sülen house telemtetba kar yamai agia liasü:

1. Longleng jila kübok kiyong ajak nung Hombar, Bodhbar aser Hokolbarnü ta anogo asem anepdang 5 nungi 9 (kiyong shia nung minute 20) tashi nung ki shiai tua jana bendenba inyakyim benoka inyaksü lemtet.
2. Kibongshia dang ita nung sen 50 agitsü lateta yuogo. Taah sen 50 agiba nungi 10 bo Waste Management Committee (WMC) operations atema rizünga ayutsü.
3. WMC-i sen ya bendentsü

aser Bank nung rizünga ayutsü aser taah agütsüba receipt/ challan office-i (QR code dena agütsütsü) bener arutsü mesüra taah ya LTC Administrator office ket tongtsütsü.

4. WMC-i jana bendentsüba tesem shima toktsütsü aser kibong kwi ali aji jangjaba sülen iba osang office nem agütsütsü.

5. WMC-isa, jana bendentsü asoshi sabang tema toktsütsü, ajisüaka iba atema tesem sadema alitsü nüngdaker.

6. Longleng jila kübok kibong ajak dang jana bendendak anana amshitsü ajungshir.

7. WMC & Longleng Town Council nati, jana mashi mashi entokba (ai, leshi aser shiruru amala densema lir) aser jana arongba atema Solid Waste Management Rules, 2026 tasenba dak ajemdaker temerenshi agütsütsü.

8. ULB-i segregated plastic waste seret nung sen 10 agi alizüktsü.

9. Taah magütsürtem nem kiyong ketdangsürtem aser ken o dak sendaka aliba department-i tenüngdakba kuli kakat aser public distribution system tem magütsütsü lemtet.

10. Complaint Redressal cell ya Administrator indang office nung lapoktsü.

11. Gari raksa mesüra mapa nung tetsükdaksür kar danga adokra WMC nem osang agütsütsü.



July 02, 2026 nü New Delhi nung Ato kilonser, Narendra Modi aser Japan Ato kilonser, Sanae Takaichi na leniba nung ketdangsertem senden amendang tangokba noksa nung angur.

Punjab sorkari doctor 59 nem state-level award agütsü

Chandigarh, July 02 (Agencies): Brihostibarnü Punjab Health Minister, Dr Balbir Singh-i sorkar hospital aser private hospital tem nung tangartem dang nungi alakteta junga inyaker doctor 59 nem State Level Doctors' Award agütsüogo.

National Doctors' Day anogomong nung Chandigarh nung sentong ka ayongzüka tangar dang nungi alakteta junga inyaker doctor tem nem tetushi agütsü.

Tang mezüing Punjab sorkari pei mapa nendaka inyakterem nem tetushi agütsütsü atema award agütsütsü asoshi telemtetba agia inyaker.

Iba asalentong kübok state health department, sorkar medical colleges aser private sectors nung doctor tem nem certificates aser mementos agütsü.

Doctors' Day anogomong nung Health Minister Balbir Singh-i Punjab Institute of Liver

& Biliary Sciences (PILBS) nung Director, Dr Virendra Singh nem alakteta tetushi agütsü.

Minister Balbir Singh-i, "Iba building ya shidakbabo Community Health Centre atema liasü saka tangbo PILBS building küma tang mezüing temesen 'transplant' surgery takok ngua agiogo. Kobi meli iba Institute nungsa tezüingjang 'transplant' surgery-a agitsü tebilemba lir," ta metetdaksü.

Minister-isa Homi Bhabha Cancer Hospital nung Director, Dr Ashish Gulia-i state nung cancer treatment jenjang ajungkettsüba aser tekeraba nung cancer tashidak putettsü aser nokdangtsü atema kanga nendaka inyakba atema pa nem tetushi agütsü.

Balbir Singh-isa nüngtugu Cardiologist Dr Bishav Mohan aser Neurologist Dr Jeyaraj D Pandian nati hub-and-spoke-based projects- STEMI aser STROKE ajanga Punjab nung

shiranger meyirjang aika kümzüka atema tena nem tetushi agütsü.

Iba anogomong nungsa Healthcare workers nem tetushi agüja Singh-i, doctor tem ya alima nung tatishitsü tajung sayurtem lir, ta metetdaksü.

Paisa, tzümetsüing süaka, COVID süaka mesüra lendong balala atalokba mapang nung nisungtem kümzüksü atema doctor temi yakbang ser inyaker, ta ashi.

Paisa doctor tem ajaki shirangertem temeim agi aser aria bilemba shisatsü agi shirangertem tajungtiba nung anepaluba atema tenüngsang agütsü.

Minister-i, private hospital tem den kasa sorkar hospital tem nunga shirangertem nem treatment tajungtiba agütsütsü atema state sorkari meranga inyaker, kechiyong shirangertemi teyari tajungtiba angutsüji sensakertem atema-a temeden ka lir, ta metetdaksü.

India aser Japan nati AI densema sector aika nung tezüingzüktep agi

New Delhi, Chiteni/July 02 (Agencies): Brihostibarnü India aser Japan nati rongsenketzüing security, clean energy, artificial intelligence (AI), defence technology, health care aser tzüym nung security tsütsü taliba amalitepa inyaksü atema tezüingzüktep agiogo.

Brihostibarnü Hyderabad House, New Delhi nung Ato kilonser Narendra Modi aser Japan Ato kilonser, Sanae Takaichi na leniba nung tongti ketdangsertem senden amenba sülen linük ana tsüingda tezüingzüktep aika agi.

Takaichi-i India asemnü (July 1-3) sendanger.

Senden tembangba süslen osangbenertem den jembidang Ato kilonser Modi-i, alima nung mejangjaba tensa aliba mapang ka nung linük anati rongsenketzüing tsütsü security atema asalentong renemogo, ta metetdaksü.

Modi-i, iba asalentong kübok semiconductors, quantum technology aser advanced materials densema tongtibang tajungba akümtsü atema inyaksü, ta ashi.

"Tanü alima nung mejangjaba tensa mapang ka nung India aser Japan napronglai rongsenketzüing aser energy tsütsü security alitsüji kanga tongtibang ta

angateta dang lir," ta pai metetdaksü.

Linük anatisa AI sector nung amalitepa inyaksü atema tezüingzüktep agi.


Modi-i, linük anati technology tsütsü amalitepa inyakbaji India-Japan tsüingda amalitep nung tongti tongshi asütsü, ta metetdaksü.

"Japan nunger technology tajung aser India nunger software ajanga jenjang tasen alangzüksü aser alima nung AI tsütsü terenlok kanga alitsü," ta pai metetdaksü.

India aser Japan nati tang mezüing defence tsütsü longjemer project inyaksü aser iba nungji naval radio antenna "Unicorn" densema alitsü; ibaji ajanga defence technology partnership nung otsü tasen ka tenzüksü, ta pai ashi.

Linük anatisa pharmaceuticals, medical osettem aser biotechnology atema amalitepa inyaksü atema tezüingzüktep agi.

Linük anati India-Japan Biogas Initiative sangdong aser iba dak sendakba nung Modi-i, iba ya ajanga India tesem ajaklen bio gas aser organic fertilizer plants 1,000 amenokba nung yaritsü, aser ibaji ajanga GobarDhan programme jenjang tajungba kümba yimtsüingtem nung azükaru alitsü, ta metetdaksü.



July 02, 2026 nü Himachal Pradesh nung Lahaul & Spiti district nung Scorpio gari ka lenmang tiplen atsü tsükpoka aluba sülen tang teyangludak apu ka nung tsükoka aliba noksa nung angur. Iba lendong nung raliwalir ka asü aser asem yiru.

Tamil Nadu nung nashi tepsetba nokdangba anema SC nung ken o benok

Chennai, July 02 (Agencies): Madras High Court-i Tamil Nadu nung nashi tepsetba tenokdangba agüja obendang agütsüba anema state sorkari Supreme Court nung ken o benokogo, ta osang ka ajanga metetdaksü.

Taküm May 27 nü Madras high court-i state chief secretary aser director general of police na dang, May 28 nü Bakrid anogo jakdang mesüra anogo mashie

nung nashi tepsetba nokdangang, ta tetuyuba agüja liasü.

Hindu Makkal Katchi nung general secretary, K Surya Prasanth-i public aliba tesem nung nashi tepsetba nokdangtsü aser state sorkar dang nashi tepsetba nokdangtsü atema tuyutsü asoshi High Court nung temepishiba ken o agütsü.

Iba sülen May 27 nü High Court-i ken o angadanga obendang agüja liasü.

State sorkari Supreme Court dang, High Court tetuyuba ya Tamil Nadu Animal Preservation Act, 1958 ozüing den meputep, ta metetdaksü.

Iba Act kübok, mapa inyaksü mesüra techanu meputsü atema metemsüba nashi küm 10 dak talibo tepsettsü atema temelaba agüja lir, ajisüaka High Court-i nashi khenyongi metepsettsü atema tetuyuba agütsü.



Ayodhya, July 02, 2026: Brihostibarnü Faizabad Bar Association nungi züingsemtemi Ram Temple Trust general secretary Champat Rai, trust züingsem Anil Mishra aser Gopal Rao nunger anema FIR beoktsü atema Ram Janm Bhoomi Police Station nung police nem tashishiba ken o agütsüadang tangokba noksa nung angur.

July 30 nü Bihar, MP aser Gujarat nung by election agitsü

New Delhi, July 02 (Agencies): Brihostibarnü Election Commission-i Bihar, Madhya Pradesh aser Gujarat nung assembly by election agitsü atema sangdongogo; election ji July 30 nü agitsü aser August 3 nü vote azüingtsü.

Bihar kübok Bankipur aser Gujarat kübok Manjalpur na nung BJP MLA tem liasü aser Madhya Pradesh kübok Datia menden nung Congress MLA liasü.

Bankipur nungi BJP MLA Nitin Nabin-i taküm April ita nung Rajya Sabha election nung takok anguba sülen iba menden azüingtetja liasü.

Taküm January ita nung Nabin ya BJP national Tir shim.

Manjalpur constituency nung BJP MLA, Yogeshbhai Narandas Patel taoba ita süadokba ajanga iba menden azüingtet aser Datia menden nung Congress MLA, Rajendra Bharti bank ochimashi ken o nung aitsüba sülen iba menden nungi anenja liasü.

Election Commission-i, by election atema notification ji July 6 nü sangdongtsü, nomination file asütsü atema tatembangbuba anogoji July 13 asütsü aser candidate temi July 16 tashi nung nomination agentsü akok, ta metetdaksü.



TIR YIMYIM YIMOBILEM (EDITRIAL)

DIMAPUR FRIDAY, JULY (CHITENI) 03, 2026

Yi jema tsüngsangba tesem !

Tamangba yimsü nung Nagaland ya Khristan state, kechiyong Naga nungerbo noklang shilem nung tukor tuko dang nungi teimba Khristan asütsü. Ibaji dang masü saka tamang nokinketertemi anir arogotem telungjem mungdangi dang masü saka Naga yimten nüchiso bushirtemi dena 'Nagaland ya Khrista asoshi' ta tenangzükba aser telemtetba tulu agia lir. Ibayongji, talisa Naga nunger Yisu dak amanger tsüraburtemibo Naga nungertemi Tsüngrem dak junga mamangtetaka, Nagaland nung lanurtem yi jema tsüngsang dakbosa malitsü ta bilema alitsü akok. Atangji, Nagaland nung ozüing agi yi meyagludaktsür aser meyokdaktsür saka Nagaland kinük kar nungbo yi yanglua alitsüa akok aser tayokba ajak nung ayokba angur. Ano yi dang masü saka lanurtem rongnung ozüing memelaba mozümora achiba tebilemtsü tulu lir. Aji oda, kibong mekümi alir aiür asangurtem dang masü saka kibong kümer alir tanur tetsütem aser tebutem aika yi aser mozümora metoktsütet timtem tia nung kibong aika akoksadagi. Ano, külen Naga nunger Khristan kibong memesük Naga nunger aika yi aser mozümora ayokba agi pei kibong mesüba purtema lir. Itemji, talisa, Dimapur nung angutsü. Item tesemtemji metetnür aonung ayaterem nung yimti yimdong ajanga süidangra, item yi jema tsüngsangdak kimaji mungdang alir amai gari sünga anendena angutsü. Ano, anepdang ka ana ako shi nung Dimapur yimti yimdong meketa süidangra, temeimtsüka aser tesasatsüka aiür asangurtem yi agi mesep asü mesüra mozü agi mesepar mejangjatetika apangteper jajaa moutet nungzütepa angutsü. Idangjibo aser idakjibo Khrista'er arogoa mali, sayutsüingir a mali, counselor a mali, tetsür tanur taküm raksatsüba anema ola adokertem toa mali, yimti nung ozüing amshirtema mali aser mitkartema mali, shinga mali, temeimtsüka, tapayutsüka aser tesasatsüka, taintema masü, küm terpungo-tertrok shi tain aiür chanu aser asangur chanutem aonung shia taküm raksadagi. Item tesemtemji anü adoker reprangdangra tenla ki agi meketbanga lir aser police station nungia parnok tsüngsangba olaji angashitsüa anasatepa angur. Itemji koba ama Naga Khristan kibong kati lapokba asütsü ? Aser item tesemtem nungji yijema tsüngsangertemji shitakba asenok chinurtem asütsü na (?) ta amanger mamangja ka bilemer. Ashiko, item yi jema tsüngsangdak lapokba 'bar' kiburtem jagi ymti nung ozüing amshitsü purtem nungi mitkartem tashi aser Naga kintem lokti tentet aser kaketshirtem telungjem lenirtem tashi nem senotsü teyari agüja alitsüa akok. Iba amaji ka masü nungbo kodaser Dimapur yimti nung yi jema tsüngsangdak paikaya lapoka otettsü ? Yi ayokba, mozü chidaktsüba aser tsüngsangdaktsübaji ozüing melaba mapa ka asünunga, Naga nunger ishika rongnung, lanur taküm paikaji anojungi raksadaktsübaji koda (?) ta bilema government ketdangsertem aser police-temi nokdangtetla sang, Naga nunger lanur taküm aika kümzükla ta temulung shia bilemer. Tanübo yi jema tsüngsangdakji asen chir malitsüa akok saka tanü item taküm raksadaktsüba mapatem ya menokdangtetra, ashiko, asüngbo yi jema tsüngsangertem rongnungji asen chir aser asen semchirtem adentsü menua mali. Aji oda, item lanurtem taküm kümzüksü asoshi asenok arogo nung lenir aser Tsüngrem tenzükertema tenla ki telong nung sentepi senshili ta kisüing rajang küma melii, sentep ki telong nung jagi kima yimdongi adoka pulpiti toktsür, hopta nung khenbo, sarasadem nokinketer aser tamang walunirtem anir item yijema tsüngsangba tesem jagi orr, yangji ken ka tena Laishiba tekong ka zünger sarasadem mapang agiba sentong ka tenzük nunga koda jungla ta bilemer. Tenla kidang jembiba ya item lanurtemi mangashir, anungji parnokji tenla kidangi aru matai asenok parnok dangi aotsüla. Kasaji, yimten aser lokti nung lenirtemia aria bilema inyakra, tangar chir taküm apayua kümzük dang, memeteti, asen chir aser semchirsemnurtem taküm, temang aser tenelaa kümzüksü.

OLEMSABANG

Tzümar nem Non-Naga Indigenous Inhabitant Certificate agütsüba keno ya atamata masü

~ S. T. Yapang Lkr, Kohima.

Tir Yimyim Rongchii 24, 2026 mezüing tapak nung "Nirmal Jain keno nung DNSU-i takok angu" ta sür adokba asenoki nguogo, iba ama takok asoshi asenok ajaki peladi aser DNSU pu semdi.

District administration aser DNSU na mapang talangka atsütepogo, aser iba mapang District Administration (DC Office) nungi tekong talangka meranga nokdak nung maksü ang ajurua lir sür aibelenogo ta ashitsü melena Nirmal Jain nem agütsüba "Registration No 97 dated March 14, 2002 ya tang nungi 'null and void' alitsü" ta zülua angur. Ya keno tulu makümdang 'shingaia marishidang temenen puri ajener' ta zülua aliba asangang nung atalokba lir.

Arogo tsütsü, Govt. tsütsü mesüra nejaren ajak nung shingaia marishidang temenen pur ka ajenbaji tajung, saka pa/la tatok meshia aru masüji ano mapa tamajung tuluba inyaktsü shingaia meteta maka, aji temenen tanüla pua alir jakla. Khristian ka asoshi aibelenogo ta ashitsüsa maparen kar lir, kar nungbo 'ni merajemi inyakogo', 'junga mebilemdangi inyakogo', ta asütsüsa aiben ajurur, yamala ashitsü melena 'null and void' ta ashiba kija nungji pelazünger mayutsüla, saka shibai item tzümar nemji Non-Naga indigenous inhabitant certificate-ji agütsüar jangjatsüla, okadak keno benoka melira aji tatem, saka okadak keno benoka lira Dimapur DC ajanga 'null and void' ta sangdongba jak pelazünger mayutsüla ta shinürba, kodang okakdak keno teptaka lidir, koba keno ka agi atsüteper ibaji 'null and void' ta shira, iba tetezüji parnoki aibelenogo ta ashiba den saku ta asenoki angatettsü akok aser iba jak keno benoker asoshi temeten angutsü lenmang tuluba lapoka aotsü imlar, kechiyong kodang okadak keno teptaka lidir tatsütepba kenoji 'null and void' ta asüba jak okadak mejembitsü masü mesüra kenoji tamagitsü akümtsüba masü.

Temenen tanüla pua aliri aniba Mungdang/Arogo dak alaka Arogoren nungbo aibeleneri tatok meshitsüji tamanger yimya, saka yabo Govt. inyakyim asünungji March 14, 2002 nung iba tzümar ajungkettsüsang ya shibar jangjatsü tim, tang temaba mendeni tur alitsü akok, saka pa/la aibelenjibo tuteta yutsütsüla, temenenji tuluba dang akümer aser tesüsa tasüba asor asünungji pa/la menenji pa/la nem sodaktsütsüla.

SASASETA LEPI AYIR

~ *Thriocy Stm, (Mokokchung)*

Pongmang lima mopung manung
alinük jenti sema jajar
asangsang limai kodang shilang,
akümlir den pilar leper kümbang tonger ali.
Leper kümbang nungji nokdaker
akümlir limaji meyipa reprangdanger,
Oh! Koda tesasatsüka taküm kaji
arishi tepiyong tazüngla nung
jaja arur liasü.

Teyanglur Tsüngremibo arishi
anogo talangka moatsür liasü,
saka taküm kaji tepur tajung
alima nem bendanga agütsür jaja,
kechi nükjidong nung yok, yimdangi maru.
Merumerutsübaji kü sobutsü,
tajungtiba dak rangloktsübaji kü nükjidong,
ni dang abensa lira aji teperi,
ibaji kü shisatsü nung liasü.
Tiyak sanga mezümekümbaji kü narozük,
kü terok nung taküptsü mali,
ni jembinütsü jembia dang aru.

Tanü leper kümbang nung
koda sasasetta nokdaker
tangar mulung yiruja rongsen
jenti ajangzüka yur kü takümbo
tekümtet mengui lepi ayir.
Adianu tajungtem ni ama leper kümbang
tonger mesasatsüsa akümlitatsüka
jajadang tajung inyakang.

Tepur tajung jagi asen mulungjang
yakta auyadoker.
Khonang nüngsangji ken asoshi dang,
akümlitatsüka jajadang jangrademtsütem nungi
taküm kaji pila alitsü merangang.
Pongmang ka pongmanger medem
asen arishi anogoji memeteti
jajadema leper kümbangji atonger.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Uttar Pradesh state sorkari Methodist Arogo li agiadok



1922 küm British nungeri yimsüsüba mapang Uttar Pradesh kübok Sitapur nung asüba Central Methodist Tenla ki noksa nung angur.

July 02, 2026: Uttar Pradesh state sorkari British nungeri yimsüsüba mapang 1922 küm asüba Central Methodist Arogo meyong ali agiadokogo; Arogo liji India nunger sen billion 1 (US dollar million 10.59) shi jenjang lir, ta osang ka ajanga metetdaksü.

June 24, 2026 nü Sitapur District Magistrate Court-i Sitapur kübok Civil lines area nung aliba ali hectare 3.56 (acre 8.79) 'grant' ji thinentsüogo.

Court-i, iba li ya sorkar meyong aser Methodist Mission Girls Junior High School-i atsünga agiba lir, ta metetdaksü.

Kasa anogo nungjisa kimong azüngteta alibajia revenue ketdangsertemi agiadokogo. Iba dak alia tongti kikümbang nungjia iba kiojen sorkari agiadokba osang metetdakja lir.

Ketdangsertemi, ali-kiojen ajakji agiadokogo ajisüaka tang tashi nungbo Tenla kijibo magi aser school jia magi, kechiyong tang Methodist Mission Girls Junior High School nungji kaketshir 800 tezüngdak lir, ta metetdaksü.

Ajisüaka state sorkari school nem senotsü teyari agütsüba ajak nokdangogo.

Civil Lines area ya Sitapur nung kanga tiyongtsü nung aliba tesem tajung ka lir; iba area nung sorkar office tem, nisungtem alidak kiojen, markets aser moapu aika lir.

Sorkar ketdangsertemi ashiba agi, lenmang nung shishilembartem atema kimong tazüng nungji terenlok mapa inyaksü aser public utility facilities aika asütsü.

Ajisüaka Arogo nung lenirtemibo kimongji kiojen asütsü aser commercial project balala atema nija property developers nem agütsütsüa

akok ta bilemer.

Methodist Church nung züngsem kati, sorkari Arogo meyong kiojen rakzüka ya ozüng alema lir, kechiyong iba kimong ya Arogo meyong lir, ta metetdaksü.

"Iba ya nija meyong aser ozü tetsü-tebou nungertemi alizükba lir," ta pai metetdaksü.

"April ita nung district collector-i notice ka agütsüba sülen onoki pa nem 'iba li ya Arogo meyong' ta kuli asüba documents agütsüogo," ta paisa metetdaksü.

Arogo atema jembitsür lawyer, Sanju Lata Lal-i, court obendang ya ozüng alema lir, anungji onoki state nung temaba court (High Court) nung ken o benoktsü, ta metetdaksüogo.

"Iba kiojen ya onok meyong, ta court nung kuli agütsütsüa

onok ket nung documents lir," ta Lal-i osangbenertem nem metetdaksü.

Uttar Pradesh nung reshikangshi ajangshiba Khristantem yarir ka, Pastor Joy Mathew-ia, iba ya Khristantem aser Khristan organizations meyong ali rakzüksü atema inyakba asalentong ka asütsü südi ta bilemer, ta metetdaksü.

Uttar Pradesh ya India nung nütsüng teimba aliba state ka lir, aser tang iba state nung BJP sorkar lir.

2024 küm Uttar Pradesh nung Khristantem anema inyakba tatalokba 209 liasü, ta United Christian Forum-i metetdaksü.

Nütsüng million 200 dak tali aliba Uttar Pradesh state nung Khristan nütsüngbo shilem kata majung.

ANOGO ABEN TSÜNGREM DEN

Bendang lima nung ken atenba

T. ken 149: 1-9

"Nenoki Kibuba sangang! Kibuba dang ken tasen ka tenang" (t.1). Kasa kenji tenla kidang dang atentsüla ta asenok tangatetba ka lir, aser idakji kecha tai mali. Ken züluri ken kaket tasen alitsü asenok dang mashir. Pai asenok dang Kibuba metetba tasen akatsü asenok dang ashir. Idangji asenoki Kibuba tenüng asangba ken tasen Kibuba dang tentettsü.

Lenten tasen ajangba shia, tenem tamajung ajangba shia, taküm nung tajangshiba shiai asenok mulungjang ken tasen zülutsütsüla. Idangji asenoki ken tasen agi Kibuba tenüng sangtettsü. Kodang asenoki timtem ka ajurudir, asenok tamang tasen inyakba angutsü aser ken tasen agi Kibuba tenüng asangtsü mapang tajung angur.

Tekong ka nung asenoki telok nung ken atentsü ken züluri ashir. Telok nung Kibuba tenüng asangba ken atendang asenok pelar. "Israeli Pa yangluba dak pelaseta lidakjang: Zion chirtem parnok chuba dak pela liang" (t.2). Kodang Tsüngrem chirtem Tsüngrem mapa asoshi tenüng sanga senteper, iba nung ajak pelateper. Pai ajangba asoshi Pa nem tenünsang agüja ajak pelateper.

Saka ano Pai ashir, asenoki yipden nunga pelateptsüla. "Parnoki tepela agi parnok yipden manunga ken tendakjang" (t.5). Kodang asenok anisüngzüka liden, shiranga aliba nungi taneptsü angudang ya inyaksü akok. Tang na yipden nung aser na anema mali. Ne yipden nung Kibuba sangang aser Pa külemang. Ken züluri ashir, "Parnok bang nung Tsüngrem nünsang tulu lidakjang, aser anatsü nok parnok ket nung kintem madak mang ayangtsü aser nisungtem madak temerenshi inyakdaksütsü" (t.6,7). Ibai rarai aor noksa ka lir. Tongpang rara nung ken atentsü.

Telok nung ken atentsü temela saka yipden nung aser tongpang rara nung temela masü. Saka asenoki tenra asenoki Kibuba sentsüwangshir, asenok aintsü. "Kibuba ajemalur takok agi tebur jungdaksür" (t.4). Asenoki Kibuba dang tenra asenok tepelaba aser temeshiba aser tali topur tajungba asütsü.

Nai Pa temeim aser taochi tejangjaba angazükdaksütsü asoshi tajangshiba balala ajanga Tsüngremi na anir. Tanü nai kechi timtem ajurudir, ibaji odang taremzüka mesüra amajok tekümdaksü. Ibaji Tsüngrem tenüng asangtsü ken tasen ka anguba südakjang.

Tsüngrem atalaba ken o nung tai tonglokja alir Khristan ka süogo

July 02, 2026: Pakistan nung Tsüngrem atalaba ken o nung tai tonglokja alir Khristan ka tepuokdak lia süogo; pa arrshi küm 61 liasü.

Khristan, Amir Peter ji 'shisa ramaba' agi shiranga liasü. Tsüngrem atalaba ken o nung pa nem tai tongloksüba sülen court nung ken o jembitsü atema küm ka jungnüa jail nung pai ataa liasü, ajisüaka ken o mejembidangyongi Bodhbarnü (July 1) pa süogo.

Amir Peter-i pa temang mejungi aliba nung ajemdaker bail temepishiba agüja liasü, ajisüaka bail temepishiba ken oji court-i angadangtsü lia pa süadok, ta Christians' True Spirit (CTS) executive director, Katherine Sapna-i metetdaksü.

Amir Peter ya Pakistan nung Punjab province kübok Lahore nungi liasü. Pa Lahore

District Camp Jail nung puoka liasü, ajisüaka pa temang tamajungba akümba sülen Punjab Institute of Mental Health (PIMH)-i anir ao, ta Sapna-i metetdaksü.

Yaküm Muslim nunger dokan shishir kati Peter-i Tsüngrem atalaogo ta tai tongloksüba sülen July 19 nü pa pua liasü.

Osangbener den jembidang Sapna-i, "Pa advanced dementia agi shiranga liasü aser pa tepuokdak aliba mapang nung temang tamajungba aküm," ta metetdaksü.

"June 29, 2026 nü ken o angadangba mapang nung judge-i taruba ken o angadangba mapang kuli agütsütsü atema Peter temang reprangsang PIMH doctor ji anir arung ta metetdaksü. Onoki bail atema kanga

meranga inyakogo, ajisüaka pa mechiokdangyongi pa Kibuba den alitsü atema ogo," ta Sapna-i metetdaksü.

"Iba tatalokba ya ajanga Pakistan nung Tsüngrem atalaba ozüng tim masüba nung amshiba kuli maneni sayur. Peter asüba ya jungjunga bushisüngdangtsüla aser aibelenertem nem temerenshi agütsütsüla," ta lai metetdaksü.

Peter-i pai Islam yimsü mesüra Islam ainkar Muhammad anema kecha mejembi ta shiogo, ajisüaka pa pua tepuokdak ayuba mapang nung police-i pa dak züka pai Tsüngrem atalaogo ta nangzükdaksütsü merang, ajisüaka pai ochi nung tekong meranga nokdak, ta lai ashi.

Peter teno, Rev. Henry Paul-i, küm pezü tejaklen ang government college ka nung pa mapa nungi anisüngzüka liasü,

ta metetdaksü.

Meimchir temeden atema inyakba organizations aser legal tsütsü mongintemi mapang talangka nungi Pakistan nung Tsüngrem atalaba ozüng ya aija arur.

Pakistan nung mangatettep adokba sülen mangyangtsü asoshi, kiojen rakzüka agitsü asoshi mesüra Khristantem/Hindu nungertem anema inyaksü atema tim masüba nung Tsüngrem atalaba ozüng ya amshir.

Iba ozüng kübok tai tonglokja loktii nisung tepsetba tatalokba aika lir aser ken o mangadangi tepuokdak ayuba tatalokba aika lir.

Tang alima nung Khristantem alitsü atema linük tamajungtiba 50 rongnung Pakistan ya jenjang 8buba nung lir (Open Doors 2026 World Watch List).

AO OSHI ANGAZÜKDAK:**TANÜ ANGAZÜKTSÜBA OJANG****Yintsü**

(n) süng mulung kanga temerang (hardest part of heartwood)

* Angami nungertemi süng yintsü amshia ki asür.

Yintsünger

(n) yin agi kechisarina tagitsü osettsüset yanglur (blacksmith)

* Asen lima nung yintsünger mali kümogo.

OLONG PAITEP # 7553

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

1. Nisung jenti - (5)
4. Tsük rudenba - (5)
6. Temzüng tesashi - (5)
8. S ___ i - (3)
9. Nisung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzüma nung senzüba - (5)

OLONG PAITEP # 7552 TELANGZÜBA**TIPIEN :**

1. Telok, 4. Aluru, 6. Ozüng,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

1. Tenükjang, 2. Luden, 3. Kioktsü,
5. Lenti, 7. Tajangzüik, 11. Teronem,
12. Sempa, 13. Jahaz.

**ALIMA NUNGBO SEMPET KÜSA DANG ANGÜTSÜ**

- Tamangtir** : Tamangertem tanübo Nisung shiai Tsüngrem asoshi kechisa inyaka Pa tenzüik pokchi shitepdi arung ?
- Amitsür** : O tesayur, nibo kü molung ajak agi Kibuba meimogo aser tenzüikogo,
- Deacon** : Nibo küm aser term kecha mesükdangi Arogoji ozü meyong amai kümer tenzüka arudagi,
- Mapangsür** : Ni mezüngyongi temesepba nungi mepila saka teka mapa chipo aonpo tolu ajungshia soruchioktsübo ni number one a no!
- Kometitem** : Onokbo koba küm kechi kometi nungsa shimar amaogo aser kechi mapasa inyakar memeteta, saka sempetbosa nguküma !
- Takar** : Nibo ni akaba rongsen nungi tangar dak alia Tsüngrem nem tenlaogo,
- Tolur** : Onokbo ayazük malangji sentep kidangi moaka mobile nungi you tube ajanga sayutsüngiba ajak angar nung kada. !
- Alokba** : Shiruru ka asünungbo tepen amai tangar sülen dang anidakaka ni Tsüngrem asoshi azü tenlaa tenzüikogo,
- Tamangtir Alokba** : Alokba, na kodangsa Tsüngrem asoshi azü tenla aka ?
- Alokba** : Onko Evanpur kiboksemi aodang tangar ataa kima nung alidang manga aser Merilai metepdang kü zü jenti laluogo,
- Tamangtir** : Nenok azü tokshira süang, teret sükdangera süang, rongsen tenlara süang, kibur ama kümer tenzükera süang, koba kometi nung shimar memeteti alirtemjia süang, Arogo nungi Alimar senpetjibo kesadang angutsü, SAKA !!! Koda ????
- Telok** : O Tamangtir !!!!

~ Lilir : I. Kilang Ajem, Indisen, Dimapur,

Manipur: Kamjong nung ki 35 dak tema rongtoktsü

Indo-Myanmar arrtsü anasa Kamjong district nung ki 35 dak tema ronger aliba noksa nung angur.

Imphal, Chiteni/July 2 (Agencies): Manipur kübok Indo-Myanmar arrtsü anasa Kamjong district nung ki 35 dak tema rongtokogo. Iba tatalokba dak sendakba nung Naga aser Kuki nungertemi kati ka dak tai tongloksütep, koba ajanga yimdaklsürtem aser Myanmar nungi refugee tem jeshia aotsüsa aküm.

Iba lendong ya International Border Pillar 102 anasa atalok. Lendong ya khenyongi dang masü saka mapang balala ana nung atalok. Iba ajanga arrtsü nung yimtsüing ishika dak kongshio.

Osang ajanga ashiba agi, mejangjaba nisungtemi anüngdang Phaimol Kuki yimtsüing maka ki 15 shi nung

mi senoktsü. Iba sülen Tangkhul Naga nunger yimtsüing Kongkan Thana aser Sangkalok nati prokshia ao kong ki 20 shi aser iba den Myanmar nunger refugee 200 shi jenoka aliba tesem dena rongtoktsü.

Iba tatalokba sülen yimtsüing nung alirtem aser Myanmar nungertem noklang aika jenshia oa liasü.

Yimtsüing balala nung ki aika rongtokba sülen Naga aser Kuki nungertem kati ka dak tai tongloksütepba arudar.

Eastern Command-Naga Village Guard (EC-NVG)-i Kuki National Army-Burma (KNA-B) aser Kuki nunger telungpurtem dak tai tongloksüingo. Parnoki ashiba

agi Naga nunger yimtsüing Kongkan Thana aser Sangkalok na amaktsü atema asa-a Phaimol nung mi senoktsü.

Kasa mapang nung Kuki Inpi Manipur (KIM) aser Committee on Tribal Unity (CoTU) nati Phaimol yimtsüing rongtoktsüba ya NSCN (IM) dak tai tongloksüingo. Parnokisa iba tesem nung security inyakyim ashishio aser ashiba agi, iba lendong ataloktsü anogo ka jilia Assam Rifles sepaitem iba tesem nungi atsüingina liasü.

Naga aser Kuki nunger lokti tentetemi Centre aser Manipur sorkar dang jenjang tapet agia arrtsü nung yimjung bener arutsütsü mepeshia metetdaksüingo.

Arunachal nung BRO-i süklep 180 talang tongtibang apu ka yanglur

Itanagar, Chiteni/July 2 (Agencies): Border Roads Organisation (BRO)-i Arunachal Pradesh kübok kinük nung aliba Kurung Kumey district nung süklep 180 talang Bailey bridge ka yangluogo. Iba apu ajanga arrtsü nung aliba tesemtem den tesendaktep tajungba kümogo aser sepa, osettsüset aser nüburtem senzisenpong tayongba kümdaktsüingo.

Iba apu ya state nung tesem tamajungtiba ka nung yangluogo. Tsüingsang mopung majungba den rongren nung inyaksangshir asü nung tetsükdaktsü aika adokaka iba

apu takok ngua yangluzükogo. Iba apu yagi raksar aliba crossing ka melenogo aser kinük nung aliba yimtsüingtem tanga tesemtem den sendakteptsüingo.

Iba mapa ya Project Arunank kübok BRO indang 756 Task Force aser 85 Road Construction Company (RCC) nati inyaka liasü. Iba inyakyim ajanga arrtsü nung aliba district tem nung lenmang, apu aser tanga tongtibang infrastructure tem yanglua tesendaktep akangshitsüingo.

Ketdangsürtemi ashiba agi, Bailey apu tasenba yagi sepaitem, military gari aser tenüngdakba osettem bener

oteta operation atema renema alitsü asoshi teyari tulu agütsütsü. Maneni iba ajanga kinük nung aliba tesemtem ajangzükdaktsütsü.

Iba apu tembanga yangluba ajanga alinük aser tsüingsang mopung mejungaka India indang northeastern frontier nung tongtibang infrastructure tem atsülangshitsü asoshi BRO maneni bendanga agütsür aliba sayur,

Iba amala project tem ya national security atema dang masü saka kinük nung alirtem loktiliba aser rongsenketzüng terenlok asoshi kanga tongtibang lir.

UNC-i SoO pact agintsü takhangba agütsü

Imphal, Chiteni/July 2 (Agencies): United Naga Council (UNC)-i, tawa Manipur Pradesh Congress Committee (MPCC)-i olen ka lemsatepba aitsüingo aser political party tem dang state nung tensa mejungi aliba tamajungba kümshidaktsütsü atema olen kecha melemsateptsü atema kümdangshitsü metetdaksüingo.

UNC-isa, 2008 Suspension of Operations (SoO) agreement agintsü aser 2016 küm district tenet kümtetba ya magitsü takhangba agütsüingo.

UNC-i ashiba agi, Manipur nung tang security aser yimden yimsüsüba dak sendakba nung tensa mejungi lir anungji tang telemdang adoker aliba ya tamajungba mekümdaktsütsü

atema ken o dak sendaka alir ajaki kümdanga jembishinüteptsüla.

Congress party-i SoO pact aser district tasen kümtetba pusema jembiba dak sendakba nung telangzüba agütsüba mapang Council-i, telemetba anaprongla yagi state yimjung raksatsüba nung tongtibang shilem agir, ta ashi.

SoO pact anema mapang talangka nungi jembia aruba indang jembiba mapang UNC-i, iba tenangzüktepba ajanga yimden yimsüsüba nung ken o mebentettsü aser kasa mapang nung telungpurtem parnok indang teseptem nungi inyaksangshitsü asoshi temelaba agütsür, ta ashi. Council-isa, Ministry of Home

Affairs (MHA) dang iba tenangzüktepba ya agintsü mepeshiba den iba ya yimjung asoshi tetsükdaktsü tulu ka kümogo, ta ashi.

Maneni UNC-i, 2016 küm December 8 nü Manipur nung district tasen tenet tentetba anema jembiogo. Parnoki ashiba agi, Naga nunger lokti tentetemi parnok tebilemtsü benokba junga mangadangi iba telemetba ya agia liasü.

Council-isa, India sorkar dang district tasen tenet tenteter aliba ya magi kümdaktsütsü asoshi tripartite sensaksem bangdaker aliba tenzüikshitsü aser ken o ya sensaksem aser tangatettep nung bentettsü mepeshia metetdaksüingo.

Russia-i Ukraine yimtiba amakdang nisung 17 tepset

Kyiv, Chiteni/July 02 (Agencies): Russia-i drone aser missile amshia Kyiv nung Bodhbar aonung nungi Brehostibarnep tashi ghonda 11 amakdang civilian 17 tepset aser timba yiru, koba Ukraine nungeri Russian oil facilities nung maka totzü agi kanga anüngdaksüba aser Tir Vladimir Putin nem khuret agütsüba asoshi tayang kepzükba lir ta Moscow-i ashir.

Ammang nung ghonda aika Ukraine yimtiba nung ola tulu adoka apokba agi anakshitsü, kong ketdangsür temi tayimtsü amshia amaker ta tekumdangtsü sangdongba sülen nisung aika subway stations nung jenoka liasü. Emergency crews tem tang tashi ki o jen raksar aliba nung nisung bushiba mapang lir.

Russia indang Defense Ministry ajanga sangdong ka nung, Ukraine-i meta talang nung civilian infrastructure amakba atema telangzüba agütsüba lir ta ashi. Ukraine-i tang tali amaker, koba Ukraine Tir Zelenskyy-i '40-day blitz' ta ajar, aser iba mapang parnoki totzü yangluba tesemtem nung tali tenük yoka Russia nunger tezü atangtsüsa totzü agi anünga kumdaktsü.

Ukraine ketdangsür temi Putin yimjung ken o jembidaki arudaktsütsü meranger ta ashir.

Rara tembangtsü asoshi yimten balalai merangba, tang tesüsa Trump administration-i merangba nung terenlok mali.

Kyiv Mayor Vitali Klitschko-i ashiba agi, tang tesüsa Russia-i amakba mapang Kyiv nung nisung 17 tepset aser 90 dak tema yiru.

Foreign Minister Andrii Sybiha-i linük yimtiba nung iba ya "night of horror" ka liasü ta ashi.

Yimti nung tesem balala 30 nung teraksatsüba liasü, talisa nisung aliba ki aser civilian infrastructure tem raksatsü, ta

Kyiv City Military Administration tekolakba Tymur Tkachenko-i ashi. Nisung aliba ki tulu 20 shi raksa, ta Interior Minister Ihor Klymenko-i ashi.

Ammang nung drones aser missiles mi adoka poksaba ajanga sangwadaktsü aser Kyiv tesem ajungalen ola tulu adoka apokba angashia liasü.

Kyiv nung alir Serhii Budko-i ashiba agi, yimti nung par district nung ballistic missile asem mesüra pezü agi kongshi. "Onok jenokdak tesem ka telung nung liasü aser onoki tsüngbang aser atem anakshiba metet," ta arishi küm 24 tain Budok-i osangbener dang ashi.

Kyiv kübok Desnianskyi district nung nisung aliba story toku ki ka raksaba telung nungi nisungtem temai madokteti liasü aser Darnytskyi district nunga story toku ki ka nungi story trok chirepa liasü.

Russia indang General Staff chief Gen. Valery Gerasimov-i iba tayang kepzüka amakba osang Putin den lemsatepogo, ta Kremlin odongtar Dmitry Peskov-i ashi.

Mitkar mesüra mitkar dak sendakba targets kisüng nung amak, ta Peskov-i ashi.

Russia-i anünglen nungi Ukraine dak amakdang aiben civilian aliba tesemtem nung kongshia lir. Iba rara nung Ukraine nunger civilian 16,000 dak tema tepsetogo, ta United Nations-i ashir.

Foreign Minister Andrii Sybiha-i Ukraine mitkari nüngdakba shilem 75 linük nung yangluba agi perier aser itemji shilem 95 amshia Russia nung meta talang nung amaker, ta April ita shia liasü. Item nok-nü yangluba factories ya kong aliar memetet.

Yasüng amakba nung "high-precision long-range weapons" aser drones amshia Kyiv aser Kyiv region nung military industry facilities aser totzü aser energy complexes nung

aser Ukraine indang tanga region pezü nung military airfield infrastructure nung amak, ta Russian Defense Ministry sangdong ajanga ashi.

Parnoki amakba tesemtem sangdongba nungya timba Ukraine nunger drones, missiles aser yangji amshiba oset yangluba tesemtem liasü.

Russia-i missiles 74 khaloktsüba nung ballistic 24 liasü aser drones tabu balala 496 liasü, ta Ukraine indang air force ajanga ashi.

Rara tepiyong Ukraine indang air defenses tajungba kuma arur, talisa Russian drones tem asoshi. Ajisüaka ballistic missiles tem nokdangtsü tasakba, aser Ukraine ketdangsür temi tembar linüktem dang Patriot missile systems tali meshia arur.


Sybiha-i linük balala dang air defense systems aser missiles agütsütsü atema telemtetba menua malitsü ajungshia liasü.

Ukraine-i meta talang nung amakba tayang kepzüker ta Russia-i kuli agütsütsü merangba pai aitsü aser Ukraine ya UN Charter indang Article 51 kübok pei sasa pei kumzüka ayutsü temeden amshir aser Russia ya tashiyim amshiba linük lir ta ashi.

Asürtem timba akumtsü akok, kechiaser rescue team tem maneni parnok mapa inyaktar, ta Sybiha-i X nung ashi.

Ukraine sepaitemi Moscow anüdoklen Nizhny Novgorod region ung Russia indang oil refineries tulutiba nung yasüng amak aser mi adoka liasü, ta Ukraine indang General Staff-i ashi.

Ano parnokisa Russia-i rakzüka aliba Luhansk region nung Siverskyi Donets River temdanga aliba railway apu ka nunga amak, ta ashi. Russian sepaitemi sepaitem, nok-nü aser military supplies belenba nung iba apu ya amshia liasü, ta General Staff-i ashir.



Thailand nung Buddhist monks toku tsükset

Mukdahan, Chiteni/July 02 (Agencies): Thailand northeast tsütsü arishi küm 11 tain tebur kati par tsürabor indang pickup gari ka anir senzüdang Buddhist monks tem yimtong süa jaja alidak oa tsüka monks toku asü aser kar yiru, ta police-i ashi.

Monks 35 aser parnok sülen anidaker nisung pongu Mukdahan province nung lenmang ka nung jaja alidang iba lendong ya atalok.

Online nung video prokshiba nung saffron sentsü süoshi aser osettsüset kar lenmang nung prokshia aliba aser gari teraksa ka nguogo. Monks pongu yangji asü aser pezü mapang tatsüka lir mozü kidang asü, ta police-i ashir.

Tanubosang yagi temelaba magi gari ya anir senzüdang maziokteti monks tem dak oa atsük, ta Agence France-Presse ajanga ashir.

Police Major General Pairoj Thaiphutsa-i iba tatalokba bushisüngdager ta ashi.

"Temulung melemi alisang ya tanur. Tatalokba jangjatsü atema gari ya forensic examination asoshi bener ogo," ta pai ashi.

Mapang tatsüka lir Thaiputsa-i teburchanu ya par tsürabor aser doctor densema ketdangsür team kati anepaluba mapang lir, ta ashi.

Tang tashi bushisüngdangba nung teburchanusang ya tangar memenep ta sayur, saka ano osang tejangja maru, ta Thaiputsa-i ashi.

Mukdahan Hospital-i yirur aliba monks tem yaritsü atema azü tenlatsü ayongzükogo.

Monks asem takum kumzüksü teimla makai lir aser ano nisung pongu kanga sashia yirur lir. Timba tila-teri yiruba atema anepaluogo, ta health ketdangsür temi ashi.

Iba monk telok nung züngsema alir Phra Sompong-i ashiba agi, pa meditation mantra "Buddho, Buddho" zünga aliba mapang lendong ya atalok.

"Tebur kati pickup truck ka anur arua aliba ni angu... aser ajungbena truck ya kanga kera aru aser onok dak atsük," ta pai video ka nung ashiba online nung prokshi.

"Tia kaa monk ka aser ni mapang shidak nung pongzüka otet. Line nung aliba mezüng monks toku takum kumzük, saka tsükshirtem anüngleni tsükshia liasü," ta ashi.

Thailand nung Buddhist monks tem kanga akumtsüboa amshir, kechiaser Buddha tesayuba wazüka ayutsü aser amshitsü parnok nem nunglokja lir. Yimtong süa jajaba ya tang tasen masü, kong nüburtemi akhumtsübo temaitsü parnok nem senotsü, chiyongtsü aser aben-süoshi agütsür.

Iba lendong matalokdang temulung melemi alisang dak alaka kidang shinga meliasü, shiba temang majungba yong school-i mao, ta police-i ashi.

Par tsürabor temi gari maliba meteta police nem osang agütsü.

Telemtetba makai Doha nung US-Iran jembishinü tembangogo

Doha, Chiteni/July 02 (Agencies): Iran aser United States tsüngta odongtar teyari nung jembishinü akaba Bodhbarnü tembangogo, saka teti yimjung alitsü atema telemtetba kecha magi aser hopta ana tejakdang sangdongba interim agreement nung angatetteper aliba ken o nung ang ranglok ta ashir.

Iba jembishinü meteta aliba sources ajanga ashiba agi, Doha nung anogo ana indoka linük ana nungi jembishinür temi Strait of Hormuz nung maritime traffic aser Iran nunger rongsen soita aliba salatsü indang jembia liasü.

Taruba senden ya Iran indang asür Supreme Leader

Ayatollah Ali Khamenei atema asüpila sentong agiba sülen amentsü, shiba July 9 nü aremstü lir, ta Qatar indang Foreign Ministry ajanga ashi.

Doha jembishinü mapang June ita rara anenba memorandum dak sendakba ken o nung terenlok tajung liasü aser item ya Switzerland nung senden ka amenba nungi adokdaktsüba lir, ta ministry odongtar-i X nung post asü.

Washington nung US Tir Donald Trump-i ashiba agi, Iran indang nuclear program azüoktsü atema jembishinüba nung terenlok lir ta ashir, aser iba kuli nung ajemdaker pai Israel den külemi February ita rara tenzük. "Iran

denuclearization jembishinü junga otar. Parnok senden junga menogo, aser reprangdangtsü," ta pai osangbener dang ashi.

Ajisüaka sources kar ajanga ashiba agi, jembishinü mapang nuclear program indang onük mesüok, koba technical yimya nung lir.

U.S. Vice President JD Vance-i iba ken o khen lir jembitsü ta ashir. "Nuclear ken o asoshi tebilemstü akar aser iba indang jembishinü tenzüksü," ta pai osangbener tem dang ashi.

American aser Iranian negotiators tem Qatari aser Pakistani odongtartem den senden balala amen ta Qatar indang foreign ministry ajanga

ashi.

Trump'er apang Jared Kushner aser US envoy Steve Witkoff na "high-level" jembishinü atema region-i yok ta White House-ibo ashi, saka jembishinü nung maden ta osang ka ajanga ashir.

Iran indang delegation nungi lenir Deputy Foreign Minister Kazem Gharibabadi-i jembishinü tembangogo ta ashi. Ajisüaka telok katia mangatettep nung atsüanem akaba indang shia mali.

Mezüng züngzüktepba nung Iran aser United States nati Strait of Hormuz ajanga rong akhi ama senzüdaktsütsü shia lir, koba ajanga rara metenzükdang alima nung totzü

aser liquid natural gas shilem pongu shi bena liasü.

Iba strait nung rong karbo senzü tenzükogo, saka iba tongtipang tzü lenmang ya shiri azüoktsüar mejangja aser taoba hopta tatemlen Iran nungeri khu abenba rong ka nung amakba mechi linük ana ya maktepa liasü.

Iran-i alima nem strait ya par kübok lir ta agizükdaktsütsü meranger aser tashiyim amshia yamaji inyaktsü, ta Iran ketdangsür anati shia lir. Mezüng agreement mapang liwaba sülen August ita tiyonglen nungi iba tesem ajanga senzüba rong tem dang parnoki tolls meshitsü ta parnoki ashir.

World Cup: England, Belgium, USA round of 16-i iogo



Chiteni/July 2, 2026 (Agencies): Atlanta nung Congo den asaya nung Harry Kane-i England atema goal ana idakja parnoki asaya goal 2-1 agi koka round of 16 tongtetogo.

Küm 60 tashi asayamung tongtibang ka danga mekokteti aruba tembangdaksütsü atema kanga meranga asayaba mapang Thomas Tuchel-i aniba team ya captain Kane-i asayamung nungi tsüksü aliba kümzüko.

Asaya nung mezügbuba goal ya Congo atema Brian Cipenga-i idaktsüba sülen asaya mezügbuba shilem tembanga liasü.

England team-i asaya tanabuba shilem kanga junga tenzü, saka goal magütsüteni asaya aliba mapang Tuchel-i

attack akangshitsü atema Bukayo Saka, Anthony Gordon aser Eberechi Eze nunger yoka liasü.

Iba sülen Gordon-i agütsüba ball ya Kane-i tongokja goal kasasa aküm aser asaya atemtsü lia minute 86buba nung Gordon-isa ball tajung ka yanglutsü koba Kane-i idakja parnoki asaya akok.

England team round of 16 nung Mexico den asayatsü.

Tanga asaya ka nung Belgium-i goal ana agi asaya mekoki aliba nungi meyipa tur Senegal goal 3-2 agi koka round of 16 tongtetogo.

Seattle nung Habib Diarra aser Ismaila Sarr nati Senegal atema goal kaka idaktsüba sülen parnok round of 16-i aitsü timla liasü.

Ajisüaka asaya atemtsü

minute pongu dang anunga lia Romelu Lukaku aser Tielemans nati Belgium atema goal kaka idaktsüba sülen goal kasasa aküm aser extra time asayaba mapang Tielemans-i penalty ka janga tasembuba goal idakja parnoki asaya kokogo.

Belgium pur round of 16 nung United States den asayatsü, shirnoki Bosnia and Herzegovina kokogo.

US aser Bosnia na asaya ya US-i goal 2-0 agi koka liasü. Küm 25 tsüingda parnok tang mezügbuba World Cup nung Round of 16-i iogo.

Asaya nung United States atema Malik Tillman-i mezügbuba goal idaktsü. Iba sülen minute 82buba nung Captain Tim Ream-ia free kick ka ajanga tanabuba goal idakja parnoki asaya kokogo.



TESÜSABA ASAYA OSANG

England	2	1	DR Congo
Belgium	3	2	Senegal
USA	2	0	Bosnia and Herzegovina

JULY 3 NÜ SAYATSÜPUR

12:30 AM	Spain	VS	Austria
4:30 AM	Portugal	VS	Croatia
8:30 AM	Switzerland	VS	Algeria
11:30 PM	Australia	VS	Egypt

JULY 4 NÜ SAYATSÜPUR

3:30 AM	Argentina	VS	Cabo Verde
7:00 AM	Colombia	VS	Ghana
10:30 PM	Canada	VS	Morocco

Everton aser Hackney na küm 5 atema tenangzüktepba yangluogo



Chiteni/July 2, 2026 (Agencies): Everton-i Middlesbrough nungi midfielder Hayden Hackney pound million 16 agi alizükogo.

Arishi küm 24 tain asaya ya Middlesbrough den tenangzüktepba yanglur aliba ano küm ka anunga lir, saka parnok taoba season Premier League atema qualify mesüetba sülen tang pai arishi küm 10 asüandang toktsüba club-i meyipa aruogo.

Hackney ya 2025-26 Championship player of the season liasü, aser Middlesbrough pur May ita play-off final tonga asayaba mapang pai teyari tulu agütsüogo. Ajisüaka parnoki final nung Hull City goal 1-0 agi makok.

"Ni iba club nung adenba atema pelar," ta Hackney-i ashi, shibai Everton den küm pongu atema tenangzüktepba yangluogo. "Ni manager [David

Moyes] den jembiba aser Everton-i ni aginer ta meteta aruba sülen Everton-i dang aotsü ta jangjar liasü," ta pai ashi.

Hackney ya Middlesbrough nungi 154 ben asaya aser iba mapang pai goal 16 idakja liasü.

Everton pur ano Chelsea nungi winger Tyrique George den tenangzüktepba yanglutsü ana nung lir. Pa ya taoba season tesadang ka loan nung Everton nungi asaya liasü.

Crystal Palace puria Hackney alizükünä liasü, shiba 2025 küm European U21 title abenba England team nung densema liasü.

Nottingham Forest puria pa den tongtepratep, saka winter transfer window tembangtsü lia sensaksem chirep.

Hackney taoba season Boro nungi league nung 39 ben asaya aser iba mapang pai goal pongu idaktsü aser assist tenet süja liasü.

Spurs-i Fernandes £85m agi alizükogo



Chiteni/July 2, 2026 (Agencies): Tottenham-i Portugal nunger midfielder Mateus Fernandes West Ham nungi pound million 85 agi alizükogo.

Fernandes ya taoba season ana Premier League nung Southampton aser West Ham nungi asaya, saka club anaprongla ya relegate süogo.

Pa alizüktsü atema Manchester United pura tejangraba liasü. Ajisüaka parnoki Spurs puri meshiba taah magütsünü liasü, koba add-ons medeni pound million 85 liasü.

Sandro Tonali pound million 80 agi alizüktsü atema bid asüba Newcastle puri magizükba sülen arishi küm 21 tain asayar ya Tottenham asoshi ajak dang

tongtibangtiba asayar liasü. Saka tang ano parnoki Tonali atema pound million 100 tashi agütsütsü mulunga aliba osang angazükogo.

Tottenham puri tang transfer window nung kanga kara shishilemba tenzüka tang tashi nung asayar pezübo alizükogo.

Taoba hopta parnoki Burnley nungi goalkeeper Martin Dubravka anisemtsü atema mulunga agizükogo. Martin indang contract ya July 1 nü tembangba sülen pa free agent ka akümstü.

Parnokisa Bournemouth aser Liverpool nungi Marcos Senesi o Andy Robertson na anisemogo aser Netherlands nunger defender Jan Paul van Hecke Brighton nungi pound

million 52 agi alizükogo.

Iba sülen parnoki central midfield Tonali alizüktsü merang saka tenangzüktepba ka meyanglutet, kechiyong New Castel-i pa ayoktsü memulungi liasü. Italy nunger asayar ya Newcastle den tenangzüktepba yangluba küm pezü anunga alir.

India aser Sri Lanka na Aug ita Test ana asayatsü

Chiteni/July 2, 2026 (Agencies): Sri Lanka Cricket (SLC)-i Brehostibarnü sangdong ka ajanga August ita India den Test ana asayatsü aliba mapanglem sangdongogo. Iba asayamung ya ICC World Test Championship 2025-27 cycle nung shilem ka asütsü.

Mezügbuba Test asaya ya Galle nung August 15 nungi 19 tashi Galle International Cricket Stadium nung asayatsü. Tanabuba Test ya Colombo nung Singhalese Sports Club nung August 23 nungi 27 tashi asayatsü.

Iba asayamung ya 2017 küm sülen India team tang mezügbuba Sri Lanka nung Test asayamung ka asayaba asütsü. 2017 küm Virat Kohli-i aniba India team-i 3-0 agi iba

asayamung koka liasü.

Taruba Test asayamung ya tang asaya aliba World Test Championship cycle nung Sri Lanka nung mezügbuba asayaba asütsü. Team anaprongla iba asayamung nung 2025-27 WTC atema point angütsü merangtsü.

World Test Championship nung India team anaben tashi final-i iogo, saka khen danga takok ngua mali. Parnok WTC rankings nung tang pongububa nung aser Sri Lanka trokbuba nung lir.

Maneni India team taküm

November-December ita New Zealand-i oa Test asaya ana asayatsü lir. Shubman Gill lenisüba nung India team England den Test asaya 2-2 nung tembang aser kidang West Indies madak takok nguogo.

Ajisüaka India team ya taoba küm South Africa-i kidang whitewashed sütsü aser iba ajanga batter temi spin masayatetba aikati ashishia liasü.

Taruba asayamung nung Sri Lanka nunger spinner temi India nunger batter tem nem timtem aika agütsütsü imlar.

BILEMDANGANG

"Lanur asüba mapang mashi-mashi aliba taaji tambur kümer agütsür."